

四庫全書

集部

欽定四庫全書

集部

文選補遺卷十四

詳校官中書臣丁榮祚

助教臣常循覆勘

總校官中書臣朱 鈐

校對官監丞臣張曾炳

謄錄監生臣趙枝發

欽定四庫全書

文選補遺卷十四

元 陳仁子 輯

上書二

諫立趙皇后書

愚曰成帝立趙后皆自武帝之立
衛后家法不正也衛子夫以平陽

公主詎者進身而有子趙飛燕以陽阿主歌舞
者進身而無子夫選后有二曰族曰德舜娶帝
堯之女禹娶塗山之女以族也商之興以有娥
周之興以姜姬以德也劉輔之言但列陳帝王
之迹而婉曲於腐木卑人之言猶未
至於觸其憤者家法不正言何為哉

劉輔

本傳輔河間宗室人舉孝廉為襄贛令上書言得失召見上美其材擢為諫大夫會

成帝欲立趙婕妤為皇后先下詔封婕妤父臨為列侯輔上書云云

臣聞天之所與必先賜以符瑞天之所違必先降以災變此神明之徵應自然之占驗也昔武王周公承順天地以饗魚鳥之瑞然猶君臣祇懼動色相戒況於季世不蒙繼嗣之福屢受威怒之異者乎雖夙夜自責改過易行畏天命念祖業妙選有德之世考卜竊窺之女以承宗廟順神祇心塞天下望子孫之祥猶恐晚暮今迺

觸情縱欲傾於卑賤之女欲以母天下不畏于天不媿
于人惑莫大焉里語曰腐木不可以為柱卑人不可以
為主天人之所不予必有禍而無福市道皆共知之朝
廷莫肯壹言臣竊傷心自念得以同姓拔擢尸祿不忠
汙辱諫爭之官不敢不盡死惟陛下深察

書奏上使侍
御史收縛輔

繫掖庭
祕獄

論救劉輔書

致堂胡氏曰成帝一時之怒雲戮死
有餘而竟赦之雖曰辛慶忌叩頭切

諫亦以理義出於良心不可泯也若推此心施
之劉輔王章則不改之過還為盛德矣成帝在

位直臣亦不為少章既獄死不可復生輔論鬼
薪不聞再用劉向精忠懇切如水沃石梅福朱
雲披心謹論並無采納獨杜欽谷永之徒阿諛
權臣乃保寵祿國欲不亡得乎○愚曰成章喜
王章言王鳳之專而鳳引帝致之死成帝怒劉
輔言趙后之事而后乃不引帝致之死即此二
事便見王鳳之權漸盛而趙后之寵
漸衰雖然輔亦宗臣劉向之亞乎

谷永

本傳劉輔諫成帝立趙后書奏上使侍御史收縛輔繫掖庭祕獄羣臣莫知其故於

是中朝左將軍辛慶忌右將軍廉褒
光祿勳師丹大中大夫永俱上書

臣聞明王垂寬容之聽崇諫爭之官廣開忠直之路不
罪狂狷之言然後百僚正位竭忠盡謀不懼後患朝廷

無諂諛之士元首無失道之讐竊見諫大夫劉輔前以縣令求見擢為諫大夫此其言必有卓詭切至當聖心者故得拔至於此旬月之間收下祕獄臣等愚以為輔幸得託公族之親在諫臣之列新從下土來未知朝廷體獨觸忌諱不足深過小罪宜隱忍而已如有大惡宜暴治理官與衆共之昔趙簡子殺其大夫鳴犢孔子臨河而還今天心未豫災異屢降水旱迭臻方當隆寬廣問褒直盡下之時也而行慘急之誅於諫爭之臣震驚羣下失忠直心假令

輔不坐直言所坐不著天下不可戶曉同姓近臣本以言顯其於治親養忠之義誠不宜幽囚于掖庭獄公卿以下見陛下進用輔亟而折傷之暴人有懼心精銳銷喪莫能盡節正言非所以昭有虞之聽廣德美之風也臣等竊深傷之惟陛下留神省察

上乃徒繫輔共工獄減死罪一等論為鬼薪

訟王尊書

致堂胡氏曰是非不明於上而清議在下此亂世之所同也使朝廷所行與清

議合斯乃治世之事也御史大夫在漢為三公位尊任重當為天子進賢材退不肖使卿大夫各稱其職而張忠偏聽丞輔之言誣奏材能之尹丞相不能辨諫大夫不與明使王尊吞聲受

斥而去漢庭空然其無人矣向非三老懷不平之心乘衆多之議伸白京兆之功績破折奏章之詆欺則一國闕失終莫能改爲國之累豈小哉夫三老不顧御史威權暴揚其罪而廟堂容納不加訕上之誅是誠美政然復用王尊拜爲刺史而張忠揚輔竟不究治則又失刑矣嗚呼此非王鳳之責與且三老之言有可取者下關後世不止一時所謂一人之身三旬之間乍賢乍佞是也士方蒙知於君父得意於柄臣則假借名譽聲過其實與之者不嫌於失言受之者不慙於不稱俄而棄逐則叢衆惡以歸之一如是可矣他日再用又再譽再逐又再毀至於三四而未已也不幾於戲乎此不義者一也忌狠當朝不樂成人之美凡人臣有以正直忠謹獲罪者不與以是名必變其所言易其本指播揚于外曰爲讒爲邪爲此附爲歸怨於君父爲

微利於後來為陰有中傷為意在離間而人君亦從而信之此不義者二也甲不幸罹咎禍乙為之白之則并乙而罪之以為結黨附下以杜公論之上聞此不義者三也凡民負冤尚許雪訴公卿士夫一從吏議則禁其伸理噤不得吐恐人君開悟誣罔失利此不義者四也去此四不義公行賞罰則清議在上人心服矣○愚曰人臣之是非邪正察之朝廷者未必真而察之草茅者始為真王尊之為人發奸摘伏者其所長也倨慢大言者其所短也若御史張忠偏聽丞輔之言而誣奏則朝廷之公論何如湖三老公乘興破折御史之奏而辯白則草茅之公論又何如幸而成帝聽之而尊得自明不然殆哉雖然漢之三老有益者三高帝發義帝喪則新城三老之言也武帝知戾太子冤則壺關三老之言也今成帝出王尊獄又湖三老之言也此

皆朝廷諸
臣所不及

公乘興

漢書尊行京兆尹事後為真凡三歲坐
遇使者無禮御史大夫忠奏尊暴虐不

改外為大言倨嫚姆上尊坐免吏民
多稱惜之湖三公乘興等上書

尊治京兆功效日著往者南山盜賊阻山橫行剽劫良
民殺奉法吏道路不通城門至以警戒步兵校尉使逐
捕暴師露衆曠日煩費不能禽制二卿坐黜羣盜寔疆
吏氣傷沮流聞四方為國家憂當此之時有能捕斬不
愛金爵重賞關內侯寬中使問所徵故司隸校尉王尊

捕羣盜方略拜為諫大夫守京輔都尉行京兆尹事尊
盡節勞心夙夜思職卑體下士厲奔北之吏起沮傷之
氣二旬之間大黨震壞渠率效首賊亂蠲除民反農業
拊循貧弱鉏耰豪彊長安宿豪大猾東市賈萬城西萬
章翦張禁酒趙放萬音矩翦張禁酒趙放此二人作酒作翦之家杜陵楊章等
皆通邪結黨挾養姦軌上千王法下亂吏治并兼役使
侵漁小民為百姓豺狼更數二千石二十年莫能禽討
尊以正法案誅皆伏其辜姦邪銷釋吏民說服尊撥劇

整亂誅暴禁邪皆前所稀有名將所不及雖拜為真未
有殊絕褒賞加於尊身今御史大夫奏尊傷害陰陽為
國家憂無承用詔書之意靖言庸違象共滔天原其所
以出御史丞楊輔故為尊書佐素行陰賊惡口不信好
以刀筆陷人於法輔常醉過尊大奴利家利家捽搏其
頰兄子閔拔刀欲剄之輔以故深怨疾毒欲傷害尊疑
輔內懷怨恨外依公事建畫為此議傳致奏文浸潤加
誣以復私怨昔白起為秦將東破韓魏南拔郢都應侯

諧之賜死杜郵吳起為魏守西河而秦韓不敢犯讒人
間焉斥逐奔楚秦聽浸潤以誅良將魏信讒言以逐賢
守此皆偏聽不聽失人之患也臣等竊痛傷尊修身潔
已砥節首公刺譏不憚將相誅惡不避豪彊誅不制之
賊解國家之憂功著職修威信不廢此誠國家爪牙之
吏折衝之臣今一旦無辜制於仇人之手傷於詆欺之
文上不得以功除罪下不得蒙棘木之聽獨掩怨讎之
偏奏被共工之大惡無所陳怨愬罪尊以京師廢亂羣

盜並興選賢徵用起家為卿賊亂既除豪猾伏辜即以
佞巧廢黜一尊之身三期之間乍賢乍佞豈不甚哉孔
子曰愛之欲其生惡之欲其死是惑也浸潤之譖不行
焉可謂明矣願下公卿大夫博士議郎定尊素行夫人
臣而傷害陰陽死誅之罪也靖言庸違放殛之刑也審
如御史章尊乃當伏觀闕之誅放於無人之域不得苟
免及任舉尊者當獲選舉之辜不可但已即不如章飾
文深詆以愬無罪亦宜有誅以懲讒賊之口絕詐欺之

路惟明主參詳使白黑分別

書奏天子復以尊為徐州刺史

論封拜丁傅書

愚曰賢臣以虛受爵祿為恥權臣以虛受爵祿為榮賢臣知有國權

臣知有身也師丹目覩丁傅外家之侯心憤董賢幸臣之貴尚言官爵臣等以及親屬無功贈封干犯天怒借已諭人幾欲愧此三家者而奈何三家之不知愧也

師丹

本傳丹字仲公琅邪東武人哀帝即位為左將軍領尚書事遂為大司馬封高樂侯

月餘為大司空上少在國見成帝委政外家王氏偕盛常內邑邑即位多欲有所匡正封拜丁傅奪王氏權丹自以師傅居三公位得信於上上書云云時綏和二年未改元

古者諒闇不言聽於冢宰三年無改於父之道前大行

尸柩在堂而官爵臣等以及親屬赫然皆貴寵封舅為陽安侯皇后尊號未定豫封父為孔鄉侯出侍中王邑射聲校尉王邯等詔書比下變動政事

比頻也

卒暴無漸

臣縱不能明陳大義復曾不能牢讓爵位相隨空受封侯增益陛下之過問者郡國多地動水出流殺人民日月不明五星失行此皆舉錯失中號令不定法度失理陰陽溷濁之應也臣伏惟人情無子年雖六七十猶博取娶而廣求孝成皇帝深見天命燭知至德

燭照也至德指謂哀

帝以壯年克已立陛下為嗣先帝暴棄天下而陛下繼體四海安寧百姓不懼此先帝聖德當合天人之功也

臣聞天威不遠顏咫尺

言帝若在前宜自肅懼

願陛下深思先帝

所以建立陛下之意且克已躬行以觀羣下之從化天下者陛下之家也肺附何患不富貴不宜倉卒先帝不量臣愚以為太傅陛下以臣託師傅故亡功德而備鼎足封大國加賜黃金位為三公職在左右

左右助也讀曰佐佑不

能盡忠補過而令庶人竊議災異數見此臣之大罪也臣

不敢言乞骸骨歸於海濱恐嫌於偽誠慙負重責義不
得不盡死

論丁傳董賢書

愚曰人君剛明則小人未足以害
治人君昏愎則小人皆足以為亂

西漢之亡其天數耶抑人為之耶哀帝憤王鳳
之專而欲繼以丁傳厚丁傳之寵而又繼以董
賢若此專擅不亡於外戚必亡於幸臣恐不待
莽而後亡也昔班固贊竇嬰田蚡灌夫以為凶
德參會噫若此丁傳董三人者真凶德參會也
特蚡嬰三人遇武帝剛明故同歸於治丁傳三
人遇哀帝昏愎則皆同歸於亂鮑宣所言切直
上引天災下援生民死亡之事使哀帝果用其
言退三人而用何武輩吾知大臣用
事西漢尚延數紀何至有莽者出

鮑宣

本傳宣字子都渤海高城人宣少文多實時帝祖母傳太后欲稱尊號丞相孔光何

武師丹傳喜等執政議失傳太后指皆免官丁傳子弟進賢貴幸宣上書

竊見孝成皇帝時外親持權人人牽引所私以充塞朝廷妨賢人路濁亂天下奢泰亡度窮困百姓是以日蝕且十彗星四起危亡之徵陛下所親見也今奈何反覆劇於前乎朝臣亡有大儒骨鯁白首耆父魁壘之反士論議通古今喟然動衆心憂國如飢渴者臣未見也敦外親小童及幸臣董賢等在公門省戶下陛下欲與

此共恭承天地安海內甚難今世俗謂不智者為能謂

智者為不能昔堯放四罪而天下服今除一吏而衆皆

惑古刑人尚服今賞人反惑請寄為姦羣小日進國家

空虛用度不足民流亡去城郭盜賊並起吏為殘賊歲

增於前凡民有七亡陰陽不和水旱為災一亡也縣官

重責更賦租稅二亡也貪吏並

步浪反
依也

公受取不已三

亡也豪彊大姓蠶食無厭四亡也苛吏繇役失農桑時

五亡也部落鼓鳴男女遮迤

列

六亡也盜賊劫略取民

財物七亡也七亡尚可又有七死酷吏毆

一曰反擊也

殺一

死也治獄深刻二死也冤陷亡辜三死也盜賊橫發四

死也怨讎相殘五死也歲惡飢饉六死也時氣疾疫七

死也民有七亡而無一得欲望國安誠難民有七死而

無一生欲望刑措誠難此非公卿守相貪殘成化之所

致邪羣臣幸得居尊官食重祿豈有肯加惻隱於細民

助陛下流教化者邪志但在營私家稱

尺孕反

賓客為姦

利而已以苟容曲從為賢以拱默尸祿為智謂如臣宣

等為愚陛下擢臣巖穴誠冀有益毫毛豈徒欲使臣美
食大官重高門之地哉天下乃皇天之天下也陛下上
為皇天子下為黎庶父母為天牧養元元視之當如一
合尸鳩之詩今貧民菜食不厭衣又穿空父子夫婦不
能相保誠可為酸鼻陛下不救將安所歸命乎柰何獨
私養外親與幸臣董賢多賞賜以大萬數使奴從賓客
漿酒霍肉

視酒如漿視肉如霍
霍豆葉也貧人茹之

蒼頭廬兒皆用致富非

天意也及汝昌侯傳商亡功而封夫官爵非陛下之官

爵乃天下之官爵也陛下取非其官官非其人而望天
說民服豈不難哉方陽侯孫寵宜陵侯息夫躬辯足以
移衆彊可用獨立姦人之雄惑世尤劇者也宜以時罷
退及外親幼童未通經術者皆宜令休就師傅急徵故
大司馬傅喜使領外親故大司空何武師丹故丞相孔
光故左將軍彭宣經皆更博士位皆歷三公智謀威信
可建教化圖安危龔勝為司直郡國皆慎選舉三輔委
輸官不敢為姦可大委任也陛下前以小不忍退武等

海內失望陛下尚能容亡功德者甚衆曾不能忍武等
邪治天下者當用天下之心為心不得自專快意而已
也上之皇天見譴下之黎庶怨恨次有諫爭之臣陛下
苟欲自薄而厚惡臣天下猶不聽也臣雖愚戇獨不知
多受祿賜美食大官廣田宅厚妻子不與惡人結仇怨
以安身邪誠迫大義官以諫爭為職不敢不竭愚惟陛
下少留神明覽五經之文厚聖人之至意深思天下之
戒臣宣叻鈍於辭不勝惓惓盡死節而已

論董賢書

愚曰漢之幸臣始於鄧通而盛於董賢

哀帝故其惡愈多積若鮑宣所言雖以擯賢實以全賢也惜帝不能從耳嗚呼哀帝之賢難望

文帝董賢之權過於鄧通若通猶不免死賢之死宜哉

鮑宣

本傳時郡國地震民訛言行籌明年正月朔日蝕上乃徵孔光免孫寵息夫躬罷侍

中諸曹黃門郎數十人宣復上書云云時元壽元年

陛下父事天母事地子養黎民即位以來父虧明母震動子訛言相驚恐今日蝕於三始誠可畏懼小民正月朔日尚恐毀敗器物何況於日虧乎陛下深內自責避

正殿舉直言求過失罷退外親及旁仄素餐之人徵拜
孔光為光祿大夫發覺孫寵息夫躬過惡免官遣就國
衆庶歎然莫不說喜天人同心人心說則天意解矣乃
二月丙戌白虹虹日連陰不雨此天有憂結未解民有
怨望未塞者也侍中駙馬都尉董賢本無葭莩之親但
以令色諛言而進賞賜無度竭盡府藏並合三第尚以
為小復壞暴室賢父子坐使天子使者將作治第行夜
吏卒皆得賞賜上冢有會輒太官為供海內貢獻當養

一君今反盡之賢家豈天意與民意邪天不可久負厚之如此反所以害之也誠欲哀賢宜為謝過天地解讎海內免遣就國收乘輿器物還之縣官如此可以父子終其性命不者海內之所仇未有得久安者也

非特忠於哀帝

亦忠於董氏也

孫寵息夫躬不宜居國可皆免以視天下復徵

何武師丹彭宣傳喜曠然使民易視以應天心建立大政以興太平之端高門去省戶數十步求見出入二年未省欲使海瀕仄陋自通遠矣願賜數刻之間極竭羣

翬之思退入三泉死亡所恨

上感大異納宣言徵何武彭宣旬月皆復為三公拜

宣為司隸

論傳喜書

愚曰處貴戚之交難也智者惟恐不退愚者惟恐不進故智氏之愎而輔果逃

武氏之橫而攸緒平一隱離羣而立於獨是非有高世之見不能也高武侯傳喜於傳太后為親屬太后欲與政事則爭欲稱尊號則又爭皆無一豪私念寧受策免而不阿附寧遣就國而不怨詐與諸傳驕奢貪進者不同他日王莽加害丁傳之家而喜獨全者非幸也宜也

何武

本傳喜哀帝祖母定陶傳太后從父弟好學有志行哀帝即位遣右將軍傳太后始

與政事太后不欲令喜輔政上於是賜喜黃金百斤上將軍印綬以光祿大夫養病大司

空何武尚書令

唐林皆上書

喜行義修絜忠誠憂國內輔之臣也今以寢病一旦遣
歸衆庶失望皆曰傅氏賢子以論議不合於定陶太后
故退百寮莫不為國恨之忠臣社稷之衛魯以季友治

亂

謂季氏亡則魯不昌

楚以子玉輕重

謂楚殺子玉而晉侯喜可知

魏以無忌

折衝項以范增存亡故楚跨有南土帶甲百萬鄰國不
以為難子玉為將則文公側席而坐及其死也君臣相
慶百萬之衆不如一賢故秦行千金以間廉頗

趙孝成王七年

秦與趙兵相距長平趙將廉頗固壁不戰秦乃使人反間於趙曰秦之所惡獨畏趙奢之子趙括為將耳趙王信之因以括為代廉頗而括軍遂敗數十萬之衆降秦秦皆坑之漢散萬金以疏亞父

喜立於朝陛下之光輝傳氏之廢興也

傳喜顯則傳氏興其廢亦如之

上亦自重之明年正月乃拜喜為大司馬封高武侯

上訟陳湯書

耿育

漢書湯言黑龍非時出當復發民徙昌陵事免為庶人徙燉煌燉煌太守秦湯前親

誅郭夫單于威行外國不宜近邊塞詔徙安定議郎耿育上書

延壽湯為聖漢揚鈞深致遠之威雪國家累年之恥討

絕域不羈之君係萬里難制之虜豈有比哉先帝嘉之
仍下明詔宣著有功改年垂歷傳之無窮應是南郡獻
白虎邊垂無警備會先帝寢疾然猶垂意不忘數使尚
書責問丞相趣立其功獨丞相匡衡排而不予封延壽
湯數百戶此功臣戰士所以失望也孝成皇帝承建業
之基乘征伐之威兵革不動國家無事而大臣傾邪讒
佞在朝曾不深維本末之難以防未然之戒欲專主威
排妒有功使湯塊然被菟拘囚不能自明卒以無罪老

棄燉煌正當西域通道令威名折衝之臣旋踵及身復
為郅支遺虜所笑誠可悲也至今奉使外蠻者未嘗不
陳郅支之誅以揚漢國之盛夫援人之功以懼敵棄人
之身以快讒豈不痛哉且安不忘危盛必慮衰今國家
素無文帝累年節儉富饒之畜又無武帝薦延梟俊禽
敵之臣獨有一陳湯耳假使異世不及陛下尚望國家
追錄其功封表其墓以勸後進也湯幸得身當聖世功
曾未久反聽邪臣鞭逐斥遠使亡逃分竄死無處所遠

覽之士莫不計度以為湯功累世不可及而湯過人情
所有湯尚如此雖復破絕筋骨暴露形骸猶復制於脣
舌為嫉妒之臣所係虜耳此臣所以為國家尤戚戚也

論王氏書

西山真氏曰成帝初即位以元舅王鳳
為大司馬大將軍領尚書事建始元年

正月封舅王崇為安成侯高根立逢時關內侯
未幾有黃霧四塞之變諫大夫楊興等以為陰
盛陽微之氣而歸咎於太后諸弟無功而侯時
王氏之權未盛故雖傾邪如楊興猶能誦言之
其後用事既久名儒如杜欽谷永大臣如張禹
不惟不敢言且陰附而為說考其始末惟劉向
以同姓之卿狼狽言之至於三四而近臣如王
章至數鳳之罪觸死而不顧向與章固賢然皆

職分所當言也。福遠方一尉耳，乃亦昌言之無所忌。至恭顯政，又能超然遠逝，以全其身。高風直矯，千載而下，猶使人興敬，其視欽、永、張、禹輩處權臣柄政之時而言者，未有不死。王章之於王鳳，是也。獨劉向與梅福幸而不死。夫劉向宗室遺老也，其勢親而易。梅福州縣小尉也，其位卑而難。帝雖未用其言，而亦不加罪。鳳亦不敢加禍者，終其身鳳其猶畏宗臣畏公議歟。

梅福

本傳：福字子真，九江壽春人。時成帝委任大將軍王鳳，鳳專執擅朝。京兆尹王章素

忠直，譏刺鳳為鳳所誅。王氏寢盛，災異數見，羣下莫敢正言。福上書云：「時永始三年，

臣聞箕子佯狂於殷，而為周陳洪範；叔孫通遁秦歸漢，

制作儀品夫叔孫先非不忠也箕子非疏其家而畔親
也不可為言也昔高祖納善若不及從諫若轉圜聽言
不求其能舉功不考其素陳平起於亡命而為謀主韓
信拔於行陳而建上將故天下之士雲合歸漢爭進奇
異知者竭其策愚者盡其慮勇士極其節怯夫勉其死
合天下之知并天下之威是以舉秦如鴻毛取楚若拾
遺此高祖所以無敵於天下也孝文皇帝起於代谷非
有周召之師伊呂之佐也循高祖之法加以恭儉當此

之時天下幾平繇是言之循高祖之法則治不循則亂
何者秦為亡道削仲尼之迹滅周公之軌壞井田除五
等禮廢樂崩王道不通故欲行王道者莫能致其功也
孝武皇帝好忠諫說至言出爵不待廉茂慶賜不須顯
功是以天下布衣各厲志竭精以赴闕廷自銜鬻者不
可勝數漢家得賢於此為盛使孝武皇帝聽用其計升
平可致於是積尸暴骨快心胡越故淮南王安緣間而
起所以計慮不成而謀議泄者以衆賢聚於本朝故其

大臣勢陵不敢和從也方今布衣迺窺國家之隙見間

而起者蜀郡是也

成帝鴻嘉中廣漢男子鄭躬等反是也

及山陽亡徒蘇

令之羣蹈藉名都大郡求黨與索隨和

求索與已和及隨已者

而

亡逃匿之意此皆輕量大臣亡所畏忌國家之權輕故

匹夫欲與上爭衡也士者國之重器得士則重失士則

輕詩云濟濟多士文王以寧廟堂之議非草茅所當言

也臣誠恐身塗野草尸并卒伍故數上書求見輒報罷

臣聞齊桓之時有以九九見者桓公不逆欲以致大也

九九算術若今
九章五曹之輩

今臣所言非特九九也陛下距臣者三

矣此天下士所以不至也昔秦武王好力任鄙叩關自
鬻繆公行伯繇余歸德今欲致天下之士民有上書求
見者輒使詣尚書問其所言言可采取者秩以升斗之
祿賜以一束之帛若是則天下之士發憤懣吐忠言嘉
謀日聞於上天下條貫國家表裏爛然可睹矣夫以四
海之廣士民之數能言之類至衆多也然其雋傑指世
陳政言成文章質之先聖而不繆施之當世合時務若

此者亦亡幾人故爵祿束帛者天下之底石高祖所以厲世摩鈍也孔子曰工欲善其事必先利其器至秦則不然張誹謗之罔以為漢毆除倒持秦阿授楚其柄故誠能勿失其柄天下雖有不順莫敢觸其鋒此孝武皇帝所以辟地建功為漢世宗也今不循伯者之道迺欲以三代選舉之法取當世之士猶察伯樂之圖求麒麟於市而不可得亦已明矣故高祖棄陳平之過而獲其謀晉文召天王齊桓用其讎亡益於時不顧逆順此所

謂伯道者也一色成體謂之醇白黑雜合謂之駁欲以承平之法治暴秦之緒猶以鄉飲酒之禮理軍市也今陛下既不納天下之言又加戮焉夫戴音緣鵲音緣遭害則

仁鳥增逝愚者蒙戮則知士深退間者愚民上疏多觸

不急之法或下廷尉而死者衆自陽朔以來天下以言

為諱

陽朔元年王章下獄死

朝廷尤甚羣臣皆承順上指莫有執

正何以明其然也取民所上書陛下之所善試下之廷

尉廷尉必曰非所宜言大不敬以此卜之一矣故京兆

尹王章資質忠直敢面引廷爭孝元皇帝擢之以厲具

臣而矯曲朝

具臣具位之臣無益者也矯正也

及至陛下戮及妻子且

惡惡止其身王章非有反畔之辜而殃及家折直士之

節結諫臣之舌羣臣皆知其非然不敢爭天下以言為

戒最國家之大患也願陛下循高祖之軌杜亡秦之路

數御十月之歌留意亡逸之戒除不急之法下亡諱之

詔博覽兼聽謀及疏賤令深者不隱遠者不塞所謂辟

四門明四目也且不急之法誹謗之微者也往者不可

及來者猶可追方今君命犯而主威奪

謂大臣犯君之命

外戚

之權日以益隆陛下不見其形願察其景建始以來日食地震以率言之三倍春秋水災亡與比數陰盛陽微金鐵為飛此何景也

河平二年沛郡鐵官鑄鐵如星飛上去權臣用事之象

漢興

以來社稷三危呂霍上官皆母后之家也親親之道全之為右當與之賢師良傅教以忠孝之道今迺尊寵其位授以魁柄使之驕逆至於夷滅此失親親之大者也自霍光之賢不能為子孫慮故權臣易世則危

按魯三家晉六

如漢曹氏魏司馬氏皆秉權至於再世之後遂以書曰
篡國蓋勢成而附者衆故也福之言信有旨哉

母若火始庸庸勢陵於君權陵於主然後防之亦無及

已上遂不納至元始中王莽顓政福一朝棄妻子去九
江至今傳以為仙其後人有見福於會稽者變名姓

為吳市
門卒云

請封孔子後書

愚曰天下事惟觸權臣之憤者言
雖公而難行惟合權臣之意者言

雖私而必用夫周封四代之後而興秦滅六國
之後而亡此天下不易之理也若以孔氏為殷
後比之周子南君萬萬不侔匡衡言之而不行
梅福言之而不納嗚呼梅福觸王鳳於前而欲
獻謀於後其不納宜也異時漢立殷後卒用孔
氏蓋斷斷不可易但福之言不合於鳳故爾

梅福

本傳成帝久亡繼嗣福以為宜建三統封孔子之世以為殷後復上書

臣聞不在其位不謀其政者職也位卑而言高者罪

也越職觸罪危言世患雖伏質橫分臣之願也

伏質斬刑也橫

分謂身首分離

守職不言沒齒身全死之日尸未腐而名滅雖

有景公之位伏櫪千駟臣不貪也故願一登文石之陛

涉赤墀之塗當戶牖之法坐

戶牖之間謂之扆言負扆也法坐正坐也聽朝之處

猶言法宮法駕也

盡平生之愚慮亡益於時有遺於世

遺留此也

臣寢所以不安食所以忘味也願陛下深省臣言臣聞

存人所以自立也壅人所以自塞也善惡之報各如其

事昔者秦滅二周夷六國隱士不顯佚民不舉絕三統

滅天道是以身危子殺厥孫不嗣

身為燕丹張良所謀子二世見殺孫謂子

嬰

所謂壅人以自塞者也故武王克殷未下車存五帝

之後封殷於宋紹夏於杞

謂封黃帝之後於蓊帝堯之後於祝帝舜之後於陳並杞

宋是為五帝

明著三統示不獨有也是以姬姓半天下遷廟

之主流出於戶所謂存人以自立者也今成湯不祀殷

人亡後陛下繼嗣久微殆為此也春秋經曰宋殺其大

夫穀梁傳曰其不稱名姓以其在祖位尊之也

事在僖二十五年

年穀梁所云在祖位者謂孔子本宋孔父之後防叔奔魯遂為魯人今宋所殺者亦孔父之後留在宋者於孔子為祖列故此言孔子故殷後也雖不正統封其子孫尊而不名也

以為殷後禮亦宜之何者諸侯奪宗聖庶奪適

奪宗始封之君

尊為諸侯則奪其舊為宗子之事也奪適文王舍伯邑考而立武王是也孔子雖庶可為殷後適讀曰嫡傳

曰賢者子孫宜有土而況聖人又殷之後哉昔成王以

諸侯禮葬周公而皇天動威雷風著災今仲尼之廟不

出闕里孔氏子孫不免編戶

人為庶人也

以聖人而歆匹夫

之祀非皇天之意也今陛下誠能據仲尼之素功以封其子孫則國家必獲其福又陛下之名與天亡極何者追聖人素功封其子孫未有法也後聖必以為則不減之名可不勉哉

諫不受單于朝書

愚曰甚哉處夷狄之難也漢哀帝建平四年單于請朝不受之

則失其心受之則費其財是故公卿所言與雄不同姑以宣帝甘露之賜觀之金珠車馬之費勿論也當是時錦繡綺縠雜帛止八千匹至建平則加至三萬匹絮止八千斤至建平則加至三萬斤又加賜衣三百襲哀帝之世力不如宣帝費則四倍於宣帝雖獲柔遠之虛名深費國

家之實力酌而處之既不卻其朝又從裁其賜
揚雄似欠一言而漢庭公卿亦無以處此吾故
曰區處之難

揚雄

漢書建平四年單于上書願朝五年時哀
帝被疾或言匈奴從上游來厭人自黃龍

竟寧時單于朝中國輒有大故由是難之以
問公卿亦以為虛費府帑可且勿許單于使
辭去未發黃門郎
揚雄上書云云

臣聞六經之治貴於未亂兵家之勝貴於未戰二者皆

微

微謂精微

然而大事之本不可不察也今單于上書求朝

國家不許而辭之臣愚以為漢與匈奴從此隙矣夫北

地之狄五帝所不能臣三王所不能制其不可使隙甚明臣不敢遠稱請引秦以來明之以秦始皇之彊蒙恬之威帶甲四十餘萬然不敢窺西河迺築長城以界之會漢初興以高祖之威靈三十萬衆困於平城士或七日不食時竒譎之士石畫之臣甚衆

石言堅固如石畫計策也

卒其

所以脫者世莫得而言也

卒終也莫得而言謂自免之計其事醜惡故不傳

又

高皇后常忿匈奴羣臣庭議樊噲請以十萬衆橫行匈奴中季布曰噲可斬也安阿順旨於是大臣權書遺之

然後匈奴之結解中國之憂平及孝文時匈奴侵暴北
邊候騎至雍甘泉京師大駭發三將軍屯細柳棘門霸
上以備之數月迺罷孝武即位設馬邑之權欲誘匈奴
使韓安國將三十萬衆徼於便墜

古地字
徼要也

匈奴覺之而

去徒費財勞師一虜不可得見況單于之面乎其後深
惟社稷之計規恢萬載之策迺大興師數十載使衛青
霍去病操兵前後十餘年於是浮西河絕大幕破寘顏
襲王庭窮極其地追奔逐北封狼居胥山禪於姑衍以

臨瀚海虜名王貴人以百數自是之後匈奴震怖益求和親然而未肯稱臣也且夫前世豈樂傾傾無量之費役無罪之人快心於狼望之北哉

匈奴中地名

以為不壹勞者

不久佚不暫費者不永寧是以忍百萬之師以摧餓虎之喙運府庫之財填廬山之壑而不悔也

喙口也廬山匈奴中山

至本始之初匈奴有桀心欲掠烏孫侵公主迺發五將之師十五萬騎獵其南而長羅侯以烏孫五萬騎震其西皆至質而還

質信也謂所期處

時鮮有所獲徒奮揚威武明

漢兵若風雷耳雖空行空反尚誅兩將軍故北狄不服
中國未得高枕安寢也逮至元康神爵之間大化神明
鴻恩博洽而匈奴內亂五單于爭立日逐呼韓邪攜國
歸死扶伏稱臣

伏音蒲
北反

然尚羈縻之計不顯制

專制謂以
為臣妾

自此之後欲朝者不距不欲者不彊何者外國天性忿
執形容魁健負力怙氣難化以善易隸以惡其彊難誣
其和難得故未服之時勞師遠攻傾國殫貨伏尸流血
破堅拔敵如彼之難也既服之後慰薦撫循交接賂遺

威儀俯仰如此之備也往時嘗屠大宛之城蹈烏桓之

壘探姑繒之壁

姑繒西
南夷種

藉蕩姐之場

毛屬也藉猶
蕩也姐音紫

父朝

鮮之旃拔兩越之旗

艾讀曰刈
絕也

近不過旬月之役遠不

離二時之勞

離歷也三
月為一時

固已犁其庭掃其閭

犁耕
也

郡縣

而置之雲徹席卷後無餘蓄惟北狄為不然真中國之

堅敵也三垂比之懸矣前世重之茲甚未易可輕也今

單于歸義懷款誠之心欲離其庭陳見於前此乃上世

之遺策神靈之所想望國家雖費不得已者也柰何距

以來獻之辭疏以無日之期消往昔之恩開將來之隙

夫款而隙之使有恨心負前言緣往辭

言單于因緣往昔和好之辭以

歸怨於漢因以自絕終無北面之心威之不可諭之

不能焉得不為大憂乎夫明者視於無形聰者聽於無

聲誠先於未然即蒙恬樊噲不復施棘門細柳不復備

馬邑之策安所設衛霍之功何得用五將之威安所震

先於未然謂計策素定禦難折衝

不然壹有隙之後雖智者勞心於內

辭者輟擊於外

輟擊言使車交馳其輟相擊

猶不若未然之時也且

往者圖西域制車師置城都護三十六國費歲以大萬

計者豈為康居烏孫能踰白龍堆而寇西邊哉

龍堆形如土龍

身無頭有尾高丈者二三大坪者九餘皆東北向相似也在西域中迺以制匈奴也夫百

年勞之一日失之費十而愛一臣竊為國不安也惟陛

下少留意於未亂未戰以遏邊萌之禍

書奏天子寤焉召還匈奴使者

史報單于書而許之

諫伐匈奴書

西山真氏曰此篇係諫王莽尤所謂三策蓋上世不問

征之其上也

然周宣之世戎狄內侵豈容不征之及境而返不勞師深入似亦未可謂非上策也尤之論五

難當矣而其終也入欲深入霆擊以創艾之此又何策邪且莽以無道而致夷狄之叛尤未嘗一言及此而顓論用兵利害莽固不足為言然尤以漢臣而甘心事莽其又何說耶

嚴尤

漢書莽新即位怙府庫之富欲立威過拜十二部將軍發郡國勇士武庫精兵各有

所屯守轉委輸於邊議滿三十萬衆齎三百日糧同時十道並出窮追匈奴內之于丁令因分其地立呼韓邪十五子莽將嚴尤諫云

臣聞匈奴為害所從來久矣未聞上世有必征之者也後世三家周漢秦征之然皆未有得上策者也周得中策漢得下策秦無策焉當周宣王時獫狁內侵至于涇

陽命將征之盡境而還其視戎狄之侵譬猶蠶蟲之螫
毆之而已故天下稱明是為中策漢武帝選將練兵約
齎輕糧深入遠戍雖有克獲之功胡輟報之兵連禍結
三十餘年中國罷耗匈奴亦創艾而天下稱武是為下
策秦始皇不忍小恥而輕民力築長城之固延袤萬里
轉輸之行起於負海疆境既完中國內竭以喪社稷是
為無策今天下遭陽九之厄比年饑饉西北邊尤甚發
三十萬衆具三百日糧東援海代南取江淮然後乃備

計其道里一年尚未集合兵先至者聚居暴露師老械
弊勢不可用此一難也邊旣空虛不能奉軍糧內調郡
國不相及屬此二難也計一人三百日食用糒十八斛
非牛力不能勝牛又當自齎食加二十斛重矣胡地沙
鹵多乏水草以往事揆之軍出未滿百日牛必物故且
盡餘糧尚多人不能負此三難也胡地秋冬甚寒春夏
甚風多齎糒鎮薪炭重不可勝

鎮釜之大口也
古釜字鎮音富

食糒

飲水以歷四時師有疾疫之憂是故前世伐胡不過百

日非不欲久勢力不能此四難也輜重自隨則輕銳者少不得疾行虜徐遁逃勢不能及幸而逢虜又累輜重如遇險阻銜尾相隨

銜馬銜也尾馬尾也言前後單行不得並驅

虜要遮前

後危殆不測此五難也大用民力功不可必立臣伏憂之今既發兵宜縱先至者令臣尤等深入霆擊且以創

艾胡虜

莽不聽尤言轉兵較如故天下騷動

文選補遺卷十四

欽定四庫全書

文選補遺卷十五

元 陳仁子 輯

上書三

訟馬援書

欽堂胡氏曰人臣進退當於義而已援事世祖二十年自用人論之位不稱才

爵不酬忠光武非簡賢者必以其女為太子妃
逆防未然故不授以重任自致身論之伐先零
守隴西出塞漢平交趾劬勞鞅掌亦既勤矣固
非尸祿素食無報效者及年衰齒暮旅力既愆
則可以乞身於君告老而去馬革裹尸之志雖
曰壯猷不幾於馮婦之所為乎卒使讒言得行

主春不終此君子所以貴於時行則行時止則止也○愚曰人之智易料於生前而難料於身後馬援以智謀之雄士平生曉兵與光武合遊二帝擇主而事知去就之義高談二祖辨論短長知成敗之理聚米為山谷知形勢之曲折鑄銅為馬式知相馬之骨法以至知王磐之敗知呂种之禍可謂絕人獨至受梁松拜不如子儀之待盧杞載薏苡而歸不若魯男子之於嫫女此則援之所不能知也雖然吾不以責援而深以此責光武也光武疑功臣其生也不能盡其用其死也不能明其枉援平生尚義散財豈有自私明珠者特濶遠有大畧而忽小節非援不知身後之禍而光武不知身後之枉此難與共安樂之譏世間不但一勾踐也而况智不如光武者乎

朱勃馬援傳同郡勃字叔陽為雲陽令詣關上書

臣聞王德聖政不忘人之功採其一美不求備於衆故

高祖赦蒯通而以王禮葬田橫

蒯通說韓信背漢高祖微通至釋不誅田橫初

自稱齊王漢定天下橫猶以五百人保於海島高祖追橫橫自殺以王禮葬之

大臣曠然咸不

自疑夫大將在外讒言在內微過輒記大功不計誠為

國之所慎也故章邯畏口而奔楚

章邯為秦將使人請事至咸陽趙高不見

有不信之心使還報邯燕將據聊而不下

史記曰燕將攻下聊城人

畏趙高讒之遂降項羽或讒之於燕燕將懼誅因保守聊

城不敢歸聊即今博州聊城縣也豈其甘心末規哉悼

巧言之傷類也竊見故伏波將軍馬援拔自西州欽慕

聖義間關險難

間關猶崎嶇也

觸冒萬死孤立羣貴之間傍無

一言之佐馳深淵入虎口豈顧計哉寧自知當要七郡

之使徼封侯之福邪八年車駕西討隗囂國計狐疑衆

營未集援建宜進之策卒破四州及吳漢下隴冀路斷

隔唯獨狄道為國堅守士民飢困寄命漏刻援奉詔西

使鎮慰邊衆乃招集豪傑曉諭羌戎謀如涌泉勢如轉

規遂救倒懸之急存幾亡之城

幾音祈幾近也

兵全師進因糧

敵人隴冀略平而獨守

式授反

空郡兵動有功師進輒克

銖鉏先零緣入山谷猛怒力戰飛矢貫脰又出征交趾

土多瘴氣援與妻子生訣無悔吝之心

吝猶恨也

遂斬滅徵

側克平一州

南海蒼梧鬱林合浦交趾日南九真皆屬交州

間復南討立陷臨

鄉師已有業未竟而死吏士雖疫援不獨存夫戰或以

久而立功或以速而致敗深入未必為得不進未必為

非人情豈樂久屯絕地不生歸哉惟援得事朝廷二十二

年北出塞漠南渡江海觸冒害氣僵死軍事名滅爵絕

國土不傳海內不知其過衆庶未聞其毀卒遇三夫之言橫被誣罔之讒家屬杜門墜不歸墓怨隙並興宗親怖慄死者不能自列生者莫為之訟臣竊傷之夫明主醲於用賞約於用刑高祖嘗與陳平金四萬斤以間楚軍不問出入所為豈復疑以錢穀間哉夫操孔父之忠而不能自免於讒此鄒陽之所悲也詩云取彼讒人投畀豺虎豺虎不食投畀有北有北不受投畀有昊此言欲令上天而平其惡惟陛下留思豎儒之言無使功臣

懷恨黃泉臣聞春秋之義罪以功除

公羊傳夏滅項孰滅之齊滅之曷為

不言齊滅為桓公諱也以桓公常有繼絕存亡之功故君子為之諱也

聖王之祀臣有五

義

禮記夫聖王之制祀也法施於人則祀之以死勤事則祀之以勞定國則祀之能禦大災則祀之能捍大患

則祀

若援所謂以死勤事者也願下公卿平援功罪宜

絕宜續以厭海內之望臣年已六十常伏田里竊感藥

布哭彭越之義

漢書彭越為梁王欒布為梁大夫使於齊越以謀反梟首洛陽詔有收視者捕

之布使還奏事越頭下祠而哭之

冒陳悲憤戰慄闕庭

論東宮師保書

愚曰人主創業莫先於教太子故創業所以得天下教太子所以守

天下秦皇并六國而不能教二世故以亡國光武復漢祚而首能教明帝所以存國當建武間既興太學擇師儒又建東宮擇師保所以建武文治煥然可述彪之言亦知本者

班彪

本傳彪字叔皮扶風安陵人時東宮初建諸王國並開而官屬未備師保多闕彪上

言曰

孔子稱性相近習相遠也賈誼以為習與善人居不能無為善猶生長於齊不能無齊言也習與惡人居不能無惡猶生長於楚不能無楚言也

賈誼上疏之辭

是以聖人審

所與居而戒慎所習昔成王之為孺子出則周公召公

太史佚入則太顓闕天南宮括散宜生左右前後禮無
違者故成王一日即位天下曠然太平是以春秋愛子
教以義方不納於邪驕奢淫佚所自邪也詩云詒厥孫
謀以宴翼子言武王之謀遺子孫也漢興太宗使鼂錯

導太子以法術賈誼教梁王以詩書

賈誼為梁王太傅
梁王文帝之少子

名揖愛而好書
故令誼傳之

及至中宗亦令劉向王褒蕭望之周

堪之徒以文章儒學保訓東宮以下

中宗宣帝也時元
帝為太子宣帝令

王褒劉向張子僑等之太子宮娛侍太子朝
夕讀誦蕭望之為太傅周堪為少傅見漢書

莫不崇簡

其人就成德器今皇太子諸王雖結髮學問修習禮樂而傳相未值賢才官屬多闕舊典宜博選名儒有威重名通政事者以為太子太傅東宮及諸王國備置官屬又舊制太子食湯沐十縣設周衛交戟五日一朝因坐東箱省視膳食其非朝日使僕中允旦旦請問而已明不媒黷廣其敬也

漢官儀曰皇太子五日一至臺因坐東箱省視膳食以法制敕太官尚食

宰吏其非朝日使僕中允旦旦請問明不媒黷所以廣敬也太子僕一人秩千石中允一人四百石主門衛徼

巡

上誹謗書

愚曰誹謗者天理之所寓公議之所出者也左傳曰庶人謗蓋庶人不與政聞

國家過失則得誹謗者也堯立誹謗之木惟恐人不言而無損於國秦立誹謗之令惟恐人有言而何益於國今孔僖與崔篆孫駟談及漢武之事乃告以誹謗先帝刺譏當世嗚呼古先帝王之得失言者無罪聞者足以戒而曰誹謗何誣上罔世之甚也肅宗之勿問賢於秦皇遠矣

孔僖

本傳僖字仲和魯國魯人與崔篆孫駟復相友善同遊太學習春秋因讀吳王夫差

時事僖廢書嘆曰若是所謂畫龍不成反為狗者駟曰然昔孝武皇帝始為天子年方十八崇信聖道師則先王五六年間號勝文景及後恣已忘其前之為善僖曰書傳若此多矣鄰房生梁郁僂和之曰如此武帝亦是狗耶僖駟默然不對郁怒恨之陰上書告駟僖

誹謗先帝刺譏當世事下有司駟諸吏受訊
傳以吏捕方至恐誅乃上書肅宗自訟曰

臣之愚意以為凡言誹謗者謂實無此事而虛加誣之
也至如孝武皇帝政之美惡顯在漢史坦如日月是為
直說書傳實傳實事非虛謗也夫帝者為善則天下之
善咸歸焉其不善則天下之惡亦萃焉斯皆有以致之
故不可以誅於人也誅責也且陛下即位以來政教未過
而德澤有加言政教未
有過失也天下所具也臣等獨何譏刺哉
假使所非實是則固應悛改儻其不當亦宜含容又何

罪焉陛下不推原大數深自為計徒肆私忿以快其意
臣等受戮死即死耳顧天下之人必回視易慮以此事
闕陛下心自今以後苟見不可之事終莫復言者矣臣
之所以不愛其死猶敢極言者誠為陛下深惜此大業
陛下若不自惜則臣何賴焉齊桓公親揚其先君之惡

以唱管仲

國語曰魯莊公束縛管仲以與齊桓公公親
迎於郊而與之坐問焉昔吾先君襄公築臺

以為高位田狩畢弋不聽國政卑聖侮士而惟女是崇
九妃六嬪陳妾數百食必梁肉衣必文繡戎士凍餒是
以國家不日引不月長恐宗廟不掃除社稷不血食敢
問為此若何管子曰昔者聖王之理天下定人之居成

人之事而慎用其六柄焉四人者勿使雜處雜處則其言唯其事易也然後羣臣得盡其

心今陛下乃欲以十世之武帝遠諱實事豈不與桓公異哉臣恐有司卒然見構銜恨蒙枉不得自敘使後世論者擅以陛下有所方比寧可復使子孫追掩之乎謹詣闕伏謁

上劉愷遜弟書

潁濱蘇轍曰天下之遜三有不若之遜有相援之遜有無故之遜遜

之為名天下之大功大善也然而至於無故之遜則聖人深疾而排之以為此姦人所以盜名而欺世也昔者公族穆子之遜韓起范宣子之遜知伯是不若之遜也舜之命禹也遜於臯陶

命益也遜於朱虎熊羆是相援之遜也丁鴻鄧彪劉愷此三人當襲父爵而以遜其弟非有先君之命非有嫡庶之別而徒遜焉以取高於世俗君子疾而深譏之以為陷於無故之遜也○愚曰讓美德也書首堯舜詩首文王春秋首魯隱史記世家首吳大伯列傳首伯夷皆讓也劉愷之讓雖若矯激沽名為人上者敦廉恥厚風俗為事存其大體而畧其小瑕勉論之可也若

有司欲繩之過矣賈逵之疏可激當時貪競之流范曄之論可戒後世好名之弊

賈逵

漢書劉愷字伯豫以當襲父般爵讓與弟憲遁逃久之有司請絕愷國逵上疏

孔子稱能以禮讓為國於從政乎何有竊見居巢侯劉般嗣子愷素行孝友謙遜絜清讓封弟憲潛身遠迹有

司不原善惡之心而繩以循常之法懼非長克讓之風

成含弘之化前世扶陽侯韋玄成

玄成字少翁韋賢薨讓封於兄弘宣帝高

其節以為河南太守元帝時為御史大夫又為丞相見前漢書也

近有陵陽侯丁鴻郾

侯鄧彪

鴻讓國於弟盛和帝時為司徒彪讓國於弟荆鳳明帝時為太尉郾音盲

並以高行

絜身辭爵未聞貶削而皆登三事今愷景仰前修有伯

夷之節宜蒙矜宥全其先功以增聖朝尚德之美

和帝納之

乞徵黃瓊李固并消弭書

愚曰善言天者必有徵於人故拘於應驗者難

言究於人事者易見後漢郎顗襄楷各以陰陽災異自名顗薦黃瓊李固之賢而楷明杜衆李

雲之寃是亦假天之說以警悟其君者也大槩東漢至順帝權臣雖橫宦寺雖強而人才尚多猶可有為故李固周舉之淵謨弘深左雄黃瓊之政事貞固桓焉楊厚以儒學進崔瑗馬融以文章顯吳祐蘇章种嵩樂巴牧民之良幹龐參虞詡將帥之弘規王龔張皓虛心以推士張綱杜喬直道以糾違彬彬備載范史之傳論順帝能倚而仗之又悟顓之所陳四事而振陽剛攬權柄雖為漢之武宣不難惜乎其倒置也若曰顓之弊失之巫過矣

郎顓

本傳顓字雅光北海安丘人薦黃瓊李固並陳消災之術曰

臣前對七事要政急務宜於今者所當施用誠知愚淺不合聖聽人賤言廢當受誅罰征營惶怖靡知厝身臣

聞剗舟剗楫將欲濟江海也聘賢選佐將以安天下也

昔唐堯在上羣龍為用

羣龍喻賢臣也

文武創德周召作輔是

以能建天地之功增日月之耀者也詩云赫赫王命仲

山甫將之邦國若否仲山甫明之宣王是賴以致雍熙

陛下踐阼以來勤心衆政而三九之位未見其人是以

災害屢臻四國未寧臣考之國典驗之聞見莫不以得

賢為功失士為敗且賢者出處翔而後集爵以德進則

其情不苟然後使君子恥貧賤而樂富貴矣若有德不

報有言不疇來無所樂進無所趨

無賞罰也

則皆懷歸數澤

修其故志矣夫求賢者上以承天下以為人不用之則逆天統違人望逆天統則災青降違人望則化不行災青降則下呼嗟化不行則君道虧四始之缺五際之危

其咎如此

四始謂關雎為國風之始鹿鳴為小雅之始文王為大雅之始清廟為頌之始缺猶廢也

翼奉傳曰易有陰陽五際孟康曰韓詩外傳云五際卯酉午戌亥也陰陽終始際會之歲於此則有變改之政

豈可不剛健篤實矜矜慄慄以守天功盛德大業乎臣伏見光祿大夫江夏黃瓊耽道樂術清亮自然被褐懷

寶含味經籍又果於從政明達變復

言明於變易消復之術也

朝廷

前加優寵賓于上位瓊入朝日淺謀謨未就因以喪病

致命遂志老子曰大音希聲大器晚成

聲震宇內謂之大音

善人

為國三年乃立天下莫不嘉朝廷有此良人而復怪其

不時還任陛下宜加隆崇之恩極養賢之禮徵反京師

以慰天下又處士漢中李固年四十通游夏之藝履顏

閔之仁絜白之節情同皎日忠貞之操好是正直卓冠

古人當世莫及元精所生王之佐臣天之生固必為聖

漢宜蒙特徵以示四方夫有出倫之才不應限以官次

昔顏子十八天下歸仁子奇穉齒化阿有聲

子奇齊人年十八為

阿邑宰出倉廩以振貧之邑內大化見說苑

若還瓊徵固任以時政伊尹傳

說不足為比則可垂景光致休祥矣臣顓明不知人伏
聽衆言百姓所歸臧否共歎願汎問百寮覈其名行有
一不合則臣為欺國惟留聖神不以人廢言謹復條便
四事附奏於左

一事孔子作春秋書正月者敬歲之始也王者則天之

象因時之序宜開發德號爵賢命士流寬大之澤垂仁厚之德順助元氣含養庶類如此則天文昭爛星辰顯列五緯循軌四時和睦不則太陽不光天地溷濁時氣錯逆霾霧蔽日自立春以來累經旬朔未見仁德有所施布但聞罪罰考掠之聲夫天之應人疾於影響而自從入歲常有蒙氣月不舒光日不宣曜日者太陽以象人君政變於下日應於天清濁之占隨政抑揚天之見異事無虛作豈獨陛下倦於萬機帷幄之政有所闕歟

何天戒之數見也臣願陛下發揚乾綱援引賢能勤求
機衡之寄以獲斷金之利臣之所陳輒以太陽為先者
明其不可久闇急於改正其異雖微其事甚重臣言雖
約其旨甚廣惟陛下乃眷臣章深留明思

二事孔子曰雷之始發大壯始君弱臣彊從解起今月
九日至十四日大壯用事消息之卦也於此六日之中

雷當發聲發聲則歲氣和王道興也

周書時訓曰春分之日玄鳥至又五

日雷乃發聲雷不發聲諸侯失人也

易曰雷出地奮豫先王以作樂崇德

殷薦之上帝雷者所以開發萌芽辟陰除害萬物須雷而解資雨而潤故經曰雷以動之雨以潤之王者崇寬大順春令則雷應節不則發動於冬當震反潛故易傳曰當雷不雷太陽弱也今蒙氣不除日月變色則其效也天網恢恢疎而不失

老子之文也

隨時進退應政得失大

人者與天地合其德與日月合其明璇璣動作與天相應雷者號令其德生養號令殆廢當生而殺則雷反作其時無歲

雷以東鳴則歲飢也

陛下若欲除災昭祉順天致和宜

察臣下尤酷害者亟加削黜以安黎元則大皓悅和雷

聲乃發

大皓天也

三事去年十月二十日癸亥太白與歲星合於房心太

白在北歲星在南相離數寸光芒交接房星者天帝明

堂布政之宮

春秋元命包曰房四星心三星

孝經鈞命決曰歲星守心

年穀豐

歲星守心為重華故年豐也

尚書洪範記曰月行中道移節

應期德厚受福重華留之

天官書曰歲星一曰攝提一曰重華

重華者謂

歲星在心也今太白從之交合明堂金木相賊而反同

合

太白金也歲星木也金剋木故相賊也

此以陰陵陽臣下專權之異也

房心東方其國主宋

卯為房心宋之分也

石氏經曰

石氏魏人石中夫人也見

藝文志

歲星出左有年出右無年今金木俱東歲星在南

是為出右恐年穀不成宋人飢也陛下宜審詳明堂布

政之務然後妖異可消五緯順序矣

五緯星也

四事易傳曰陽無德則旱陰僭陽亦旱陽無德者人君

恩澤不施於人也陰僭陽者祿去公室臣下專權也自

冬涉春訖無嘉澤數有西風反逆時節

春當東風也

朝廷勞

心廣為禱祈薦祭山川暴龍移市臣聞皇天感物不為
偽動災變應人要在責己若令雨可請降水可禳止則
歲無隔并太平可待然而災害不息者患不在此也

不在

祈禱

立春以來未見朝廷賞錄有功表顯有德存問孤寡

賑恤貧弱而但見洛陽都官奔車東西收繫纖介牢獄
充盈臣聞恭陵火處比有光曜明此天災非人之咎丁
丑大風掩蔽天地風者號令天之威怒皆所以感悟人
君忠厚之戒又連月無雨將害粟麥若一穀不登則飢

者十三四矣陛下誠宜廣被恩澤貸贍元元昔堯遭九

年之水人有十年之蓄者簡稅防災為其方也

簡少也方法也

願陛下早宣德澤以應天功若臣言不用朝政不改者
立夏之後乃有澍雨於今之際未可望也若政變於朝
而天不雨則臣為誣上愚不知量分當鼎鑊

論封梁冀書

西山真氏曰桓帝之立梁冀之力也而杜喬以為不當賞何哉蓋人君之

得天位天之命也命出於天而人臣竊之以為已功人君舉其功以歸之臣下是皆不知有天命者也杜喬之言不亦正乎

杜喬

本傳喬字叔榮河南林慮人梁冀子弟五人及中常侍等以無功並封喬上書

陛下越從藩臣龍飛即位天人屬心萬邦攸賴不急忠賢之禮而先左右之封傷善害德興長佞諛臣聞古之明君褒罰必以功過末世闇主誅賞各緣其私今梁氏

一門宦者微孽

公羊傳臣僕庶孽之事何休註孽賤子也猶樹之有孽生

並帶無功

之紱裂勞臣之土其為乖濫胡可勝言夫有功不賞為善失其望姦回不詰為惡肆其凶故陳資斧而人靡畏

班爵位而物無勸

周易旅于處得其資斧漢書音義資利也

苟遂斯道豈伊

傷政為亂而已喪身亡國可不慎哉

論中官養子襲爵書

致堂胡氏曰周官有奄人以精氣閉藏者為之後乃用刑

人趙高猶非出於蠶室也生而隱宮古之奄也必天刑之則亦鮮矣後世乃特開此門絕人之世不為防制昏朝濁代至數千員大逆天理又以敗其國家不知何所急而為之也不幸前已有之猶當裁損其員數卑約其品祿而禁其未然者何乃許之襲爵養子與全人比乎茅土之封所以待功勳建賢德而加諸刀鋸之賤似續之任所以繼先祖傳後來而責諸不父之家且殘無罪之人息生生之道耗蠹財用崇長禍階一舉而六失併焉有天下國家者可不深思而痛革之乎

張綱

漢書綱字文紀常感激慨然歎曰穢惡滿朝不能奮身出命掃國家之難雖生吾不

願也退而

上書曰

詩曰不愆不忘率由舊章尋大漢初隆及中興之世文明二帝德化尤盛觀其理為易循易見但恭儉守節約身尚德而已中官常侍不過兩人近倖賞賜裁滿數金惜費重人故家給人足夷狄聞中國優富任信道德所以姦謀自消而和氣感應而頃者以來不遵舊典無功小人皆有官爵富之驕之而復害之非愛人重器承天

順道者也伏願陛下少留聖思割損左右以奉天心

再論宦官書

致堂胡氏曰文帝好用黃老非黃老能清靜也文景有愛民之德故效臻

於清靜耳明帝致浮屠非浮屠能治平也明帝有寧民之政故效臻於治平耳逮其末流先業不嗣而其從事祠享要求福利於異端之術一何愚哉此亦祖宗師表不正之所致也或曰兩漢好尚儒術東京晚節教養尤甚然黨錮之禍興于太學則尊事孔子者亦豈無弊乎曰子可謂蒙蔽之民矣黨錮之禍豈諸生所願欲哉桓靈稍有世祖顯宗之見取此二百人墮才任使其治效當不愧於建武永平之盛矣惟讎疾賢才而斷喪之也故宦官蠹於內百姓怨於外英雄並起而忠良計畫之士各為知己者用三方鼎峙漢室遂虛是豈諸生宗師孔子之弊耶

襄楷

臣伏見大白北入數日復出東方其占當有大兵中國
弱四夷彊臣又推步熒惑今當出而潛必有陰謀皆由
獄多鬼結忠臣被戮德星所以久守執法亦為此也

德星

歲星也

陛下宜承天意理察鬼獄為劉瓚成瑨虧除罪辟

追錄李雲杜衆等子孫夫天子事天不孝則日蝕星鬬
比年日蝕於正朔三光不明五緯錯戾前者宮崇所獻
神書專以奉天地順五行為本亦有興國廣嗣之術其

文易曉參同經典而順帝不行故國胤不興太平經興

真人問神人曰吾欲使帝王立致太平豈可聞邪神人
言但順天地之道不失銖分則立致太平元氣有三名
為太陽太陰中和形體有三名為天地人天有三名為
日月星北極為中也地有三名為山川與平土人有三
名為父母子政有三名為君臣人此三者常相得腹心
不失銖分使其同一憂右成一家立致太平延年不疑
也又問曰今何故其生子少也天師曰善哉子之言也
但施不得其意耳如令施其人欲生也開其玉戶施種
於中比若春種於地也十十相應和而生其施不以其
時比若十月種物於地也十十盡死固無生者真人欲
重知其審今無子之女雖日百施其中猶無所生也不
得其所生之處比若此矣是故古者聖賢不妄施於不
生之地也名為亡種竭氣而無所生成今太平氣到或
有不生子者反斷絕天地之統使國少人理國之道多

人則國富少人則國貧今天上皇之氣已到天皇氣生物乃當萬倍其初天地孝冲孝質頻世

短祚臣又聞之得主所好自非正道神為生虐故周衰

諸侯以力征相尚於是夏育申休宋萬彭生任鄙之徒

生於其時

並多力之人也夏育衛人力舉千鈞宋萬宋人殺昏公遇大夫仇牧於門批而殺之蓋著

門闔彭生齊人拉魯桓公幹而殺之范睢曰以任鄙人力焉而死申休未詳何世也殷紂好色妲

己是出

妲己蘇人之美女也獻於紂紂納為妻常與沉湎于酒事見列女傳葉公好龍真

龍游廷

子張見魯哀公七日哀公不禮子張曰君之好事有似葉公子高之好龍也葉公子高好畫龍

天龍聞之降之窺頭於牖葉公子高見之棄而反走五色無主是葉公子高好夫似龍而非好真龍事見新序

今黃門常侍天刑之人陛下愛待兼倍常寵繼嗣未兆

豈不為此天官宦者星不在紫宮而在天市明當給使

主市里也

山陽公載記市垣二十二星而帝坐居其中宦者四星唯供市買之事

今乃反

處常伯之位實非天意又聞宮中立黃老浮屠之祠此

道清虛貴尚無為好生惡殺省慾去奢今陛下嗜慾不

去殺罰過理既乖其道豈獲其祚哉或言老子入夷狄

為浮屠浮屠不三宿桑下不欲久生恩愛精之至也

言

屠之人寄桑下者不經三宿便即移去示無愛戀之心

天神遺以好女浮屠曰此

但革囊盛血遂不盼之

四十三章經天神獻玉女於佛佛曰此是革囊盛血穢耳其

守一如此乃能成道今陛下姪女豔婦極天下之麗甘

肥飲美單天下之味柰何欲如黃老乎

論犯贓并坐舉主書

愚曰楊林犯贓坐舉主之說此漢法也漢法薦舉之路甚

廣而同坐之法亦嚴如嚴延年薦獄吏有贓不
入身猶坐貶秩張勃舉茂才不以實亦坐削戶
二百當時貢禹請選舉不實輒行其誅亡但免
官其嚴如此故擇舉主於未用之先察舉人於
將用之始責舉主於已用之後此良法也第人
最難知丙吉能舉于杜而不免失於萬年之諂
諛何武能舉龔唐而不免失於雅拜之盤辟倫
欲立罰不先立賞則嚴於誅而略於勸人亦有

所憚而畏人材亦無由見矣此法所以貴於周而盡也

楊倫

本傳倫字仲理陳留東昏人時邵陵令任嘉在職貪穢因遷武威太守後有司奏嘉

賊罪十萬徵考廷尉其所牽染將相大臣百有餘人倫乃上書曰

臣聞春秋誅惡及本本誅則惡消振裘持領領正則毛理今任嘉所坐狼籍未受辜戮猥以垢身改典大郡自非案坐舉者無以禁絕姦萌往者湖陸令張疊蕭令馮賢徐州刺史劉福等釁穢已章咸伏其誅而豺狼之吏至今不絕者豈非本舉之主不加之罪乎昔齊威之霸

殺姦臣五人并及舉者以弭謗讞當斷不斷黃石所戒

事見黃石公三畧

夫聖王所以聽僮夫匹婦之言者猶塵加高

岱霧集淮海雖未有益不為損也惟陛下留神省察

上救朱穆書

西山真氏曰桓帝寵宦孺而抑忠良李雲杜衆以此死於前朱穆又以是

死於後亡國之政日促矣

劉陶

漢書宦者趙忠喪父歸葬安平僭為璆璫王匡偶人穆聞之下郡案驗吏畏其嚴明

遂發墓剖棺陳尸出之而收其家屬帝聞大怒徵穆詣廷尉輸作左校太學書生劉陶等

數千人詣闕上書訟穆曰

伏見施刑徒朱穆處公憂國拜州之日志清姦惡誠以
常侍貴寵父兄子弟布在州郡競為虎狼噬食小人故
穆張理天網補綴漏目羅取殘禍以塞天意由是內官
咸共患疾謗讟煩興讒隙仍作極其刑謫輸作左校天
下有識皆以穆同勤禹稷而被共鯨之戾若死者有知
則唐帝怒於崇山重華忿於蒼墓矣尚書放驩兜於崇山孔安國註曰崇

山南裔也山海經曰有讎頭之國帝堯葬焉郭璞註讎頭驩兜也禮記葬葬蒼梧之野

當今中官

近習竊持國柄手握王爵口含天憲運賞則使餓隸富

於季孫

運行也論語曰季氏富於周公

呼喻則令伊顏化為桀跖而穆

獨亢然不顧身害非惡榮而好辱惡生而好死也徒感

王網之不攝

攝持也

懼天網之久失故心懷憂為上深計

臣願黥首繫趾代穆校作

帝覽其奏赦之○黥首謂鑿額涅墨也繫趾謂欽其足也

以鐵著足曰欽也○愚曰劉陶在東漢氣節挺挺文詞振發直有賈生論事之風觀穆為宦者所陷陶力救之陶為宦者所陷獨無能救之者噫

論賞功立后書

范曄論曰禮有五諫諷為上若夫託物見情因文載旨使言之者無

罪聞之者足以自戒貴在於意達言從理歸乎正曷其絞訐摩上以銜沽成名哉李雲草茅之

生不識失身之義遂乃露布帝者班檄三公至
於誅死而不顧斯豈古之狂也夫未信而諫則
以為謗已故說者識其難焉○愚曰人臣欲有
言於君欲使其明白而相從不當訐直以相抗
以愚觀李雲志雖忠而言則過非言事者之法
也且以雲論黃精之變曰陳項虞田許氏不可
令居典兵之官使桓帝如煬帝誤殺李金才則
害人多矣嗟夫帝欲不諱是何等語他主聞之
尚駭況桓帝乎若此等言非但無益於國而實
有害於身雖同時如劉陶之訐直亦不至觸諱
若此亦可為
言者之戒

李雲

本傳雲字行祖甘陵人桓帝延熹二年誅

大將軍梁冀而中常侍單超等五人皆以
誅冀功並封列侯專權選舉又立掖庭民女
毫氏為皇后數月間后家封者四人賞賜巨

萬是時地數震裂衆災頻降雲素剛憂國
將危心不能忍乃露布上書移副三府曰

臣聞皇后天下母德配坤靈得其人則五氏來備不得
其人地動搖宮比年災異可謂多矣皇天之戒可謂至
矣高祖受命至今三百六十四歲君期一周當有黃精
代見姓陳項虞田許氏不可令此人居太尉太傅典兵
之官舉厝至重不可不慎班功行賞宜應其實梁冀雖
持權專擅虐流天下今以罪行誅猶召家臣搯音厄持也捉也
殺之耳而猥封謀臣萬戶以上高祖聞之得無見非西

北列將

謂皇甫規段熲

得無解體孔子曰帝者諦也

春秋運斗樞曰五帝

修名立功修德成化統調陰物色陽招類使神故稱帝帝之言諦也鄭玄註審諦於言也○劉攽曰註帝之諦

案文言當在諦字上

今官位錯亂小人諂進財貨公行政化日損

尺一拜用不經御省是帝欲不諦乎

宦官女寵書

劉瑜

本傳瑜字季節廣陵人延熹八年太尉楊秉舉賢良方正及到京師上書曰

臣瑜自念東國鄙陋得以豐沛枝屑被蒙復除不給卒伍故太尉楊秉知臣竊闕典籍猥見顯舉誠冀臣愚直

有補萬一而秉忠謨不遂命先朝露臣在下土聽聞歌
謠驕臣虐政之事遠近呼嗟之音竊為辛楚泣血連如
幸得引錄備答聖問泄寫至情不敢庸回

庸用也
回邪也

誠願

陛下且以須臾之慮覽今往之事人何為咨嗟天曷為
動變蓋諸侯之位上法四七垂文炳耀關之盛衰者也

四七二十八宿也諸侯為天子守四方猶天之
有二十八宿漢官儀曰天子建侯上法四七也

今中官

邪孽比肩列土皆競立肩嗣繼體傳爵或乞子疎屬或
買兒市道殆垂開國承家之義古者天子一娶九女

公羊

傳諸侯一聘三女天子一娶九女夏殷制也

娣姪有序河圖授嗣正在九房

令女嬃令色充積閨帷皆當盛其玩飾冗食空宮勞散精神生長六疾此國之費也生之傷也且天地之性陰陽正紀隔絕其道則水旱為并詩云五日為期六日不詹怨曠作歌仲尼所錄況從幼至長幽藏歿身又常侍黃門亦廣妻娶怨毒之氣結成妖青行路之言官發畧人女取而復置轉相驚懼孰不悉然無緣空生此謗鄒衍匹夫杞氏匹婦尚有城崩霜隕之異況乃羣輩咨怨

能無感乎

淮南子曰鄒衍事燕惠王盡忠左右譖之王繫之仰天而哭五月天為之下霜列女傳曰

齊人杞梁糞莒戰死其妻無所歸乃就夫尸於城下而哭之七日城崩

昔秦作阿房國多

刑人今第舍增多窮極奇巧掘山攻石不避時令促以嚴刑威以正法民無罪而覆入之民有田而覆奪之州郡官府各自考事姦情賕賂皆為吏餌民愁鬱結起入賊黨官輒興兵誅討其罪貧困之民或有賣其首級以要酬賞父兄相代殘身妻孥相視分裂窮之如彼代之如此豈不痛哉又陛下以北辰之尊神器之寶而微行

近習之家私幸宦官之舍賓客市買熏灼道路因此暴縱無所不容今三公在位皆博達道藝而各正諸己莫或匡益者非不智也畏死罰也惟陛下設置七臣以廣諫道及開東序金縢史官之書從堯舜禹湯文武致興之道遠佞邪之人放鄭衛之聲則正致和平德感祥風矣臣慙慙推情言不足採懼以觸忤征營惴惴

論虹蜺降嘉德殿書

愚曰嘗讀范曄五行志以靈帝時北氣墮溫明殿蔡邕言

為天投蜺之象按元命苞曰陰陽交為虹蜺又考靈樞曰日旁氣白為虹莊子曰陽灸陰為虹

夫雨氣成虹朝陽射之則在西夕陽射之則在東則虹之氣蓋暈於日而成也今志所載氣黑如車蓋則此氣特沴氣而已今覆殿庭大位將傾未必便可指為虹蜺故辨之

楊賜

五行志靈帝光和元年六月丁丑有北氣墮北宮溫明殿東庭中黑如車蓋起奮訊

身五色有頭體長十餘丈形貌似龍上問蔡邕對曰所謂天投蜺者也。不見足尾不得稱龍。易傳曰蜺之比無德以色親也。潛潭巴曰虹出后妃陰脅王者。又曰五色迭至照于宮殿有兵革之事。

臣聞之經傳或得神以昌或得神以亡國家休明則鑒其德邪辟昏亂則視其禍今殿前之氣應為虹蜺皆妖

邪所生不正之象詩人所謂蝮蝮者也於中孚經曰蝮

之比無德以色親

易稽覽圖中孚經之文也比類也鄭玄註蝮邪氣也陰無德以好色得親

幸於陽也

方今內多嬖倖外任小臣上下並怨諠譁盈路是

以災異屢見前後丁寧今復投蝮可謂孰矣

孰成也

案春

秋識曰天投蝮天下怨海內亂

春秋演孔圖曰霓者斗之亂精也失度投霓見

宋均註投霓投應也

加四百之期亦復垂及

漢終於四百年解見獻帝紀

昔虹

貫牛山管仲諫桓公無近妃宮

春秋文曜鉤曰白虹貫牛山管仲諫曰無近妃

宮君恐失權齊侯大懼退去色黨更立賢輔使后出望土牛山四面聽之以厭神宋均註山君位也虹霓陰氣

也陰氣貫之君惑於妻黨之象也望謂祭以謝過也流俗本山作升者誤也

易曰天垂象見

吉凶聖人則之今妾媵嬖人閹尹之徒共專國朝欺罔日月又鴻都門下招會羣小造作賦說以蟲篆小技見寵於時如驩兜共工更相薦說旬月之間並各拔擢樂松處常伯任芝居納言郗儉梁鵠俱以便辟之性佞辯之心各受封爵不次之寵而令搢紳之徒委伏畎畝口誦堯舜之言身蹈絕俗之行棄捐溝壑不見逮及冠履倒易陵谷代處從小人之邪意順無知之私欲不念板

蕩之作虺蜴之誠殆哉之危莫過於今幸賴皇天垂象
謹告周書曰天子見怪則修德諸侯見怪則修政卿大
夫見怪則修職士庶人見怪則修身唯陛下慎經典之
誠圖變復之道斥遠佞巧之臣速徵鶴鳴之士內親張
仲外任山甫斷絕尺一抑止槃游留思庶政無敢怠遑
冀上天還威衆變可弭老臣過受師傅之任數蒙寵異
之恩豈敢愛惜垂沒之年而不盡其悽悽之心哉

乞斬十常侍書

愚曰世有迫於心而激於言者皆其憤之深而不獲騁焉者也雖然

憤而言猶可也憤而不止於言不可也生殺者
人主之大柄也而下之人曰生某曰殺某直騁
一言以為決彼非僭且狂也天下之憤莫甚於
利害之相交又莫甚於上下之相蒙又其甚者
鬱抑而不得逞則激烈於言亦其大有所不堪者
也昔者張禹師傳也而朱雲欲斬之國忠宰相
而唐兵搶揭之誅賞之權不出於上而出於下
幾若倒置者而君子以為其為惡也固其為憤
也切則其言自有不獲止者張均斬十常侍之
疏吾因得以諒其憤矣靈帝不從所言以釋其
憤遂使誣奏以死虛言不中則積為袁紹舉兵
之憤興晉陽之甲除君側之惡而事勢去矣鈞
言雖憤也其
猶可為哉

張鈞

漢書鈞是時讓忠及夏惲郭勝孫璋畢嵐
栗嵩段珪高望張恭韓悝宋典十二人皆

為中常侍封侯貴寵父兄子弟布列州郡所
在貪殘為人蠹害黃巾既作盜賊麋沸郎中


中山張鈞

上書曰

竊惟張角所以能興兵作亂萬人所以樂附之者其源
皆由十常侍多放父兄子弟婚親賓客典據州郡辜權
財利侵掠百姓百姓之冤無所告訴故謀議不軌聚為
盜賊宜斬十常侍縣頭南郊以謝百姓又遣使者布告
天下可不須師旅而大寇自消

天子以鈞章示讓等皆
免冠徒跣頓首乞自致

洛陽詔獄並出家財以助軍費有詔皆冠履視事如故
帝怒鈞曰此真狂子也十常侍固當有一人善者不



文選補遺卷十五

文選補遺卷十五